

Bakau kluster baharu di Semporna

20 kes jangkitan baharu, satu kematian dilaporkan

Oleh Noor Atiqah Sulaiman
bhnews@bh.com.my

Putrajaya: Kluster Bakau di Semporna, Sabah, diisyiharkan sebagai kluster baharu COVID-19 dengan tiga kes positif direkodkan, setakat semalam.

Ketua Pengarah Kesihatan, Tan Sri Dr Noor Hisham Abdullah, berkata kes indeks kluster itu ialah seorang wanita warga Filipina (kes 10,145) yang juga kes kematian dilaporkan, kelmarin.

"Ujian saringan COVID-19 terhadap kes indeks didapati positif, Rabu lalu. Susulan itu, saringan kontak rapat dijalankan sebelum dua lagi individu dikesan positif.

"Dua kes positif itu membabitkan seorang rakyat tempatan dan seorang warga Filipina. Mereka dimasukkan ke Hospital Tawau untuk rawatan lanjut," katanya dalam kenyataan, semalam.

Dr Noor Hisham memaklum-

kan, setakat jam 12 tengah hari semalam, pihaknya sudah melakukan ujian saringan terhadap 109 individu dalam kluster itu.

"Keputusan ujian saringan terbabit mendapati hingga kini, hanya tiga individu positif, manakala 106 lagi masih menunggu keputusan.

"Langkah pencegahan jangkitan, termasuk proses nyah kuman dan pembersihan sudah dijalankan di Hospital Semporna. Punca jangkitan masih dalam siasatan," katanya.

Selain Kluster Bakau, empat lagi kluster masih aktif di Sabah ialah Kluster Benteng Lahad Datu (LD), Kluster Pulau, Kluster Selamat dan Kluster Laut.

Dalam pada itu, negara merekodkan korban baharu COVID-19 dua hari berturut-turut dengan kes kematian ke-130, semalam, membabitkan seorang lelaki warga Malaysia berusia 82 tahun.

Dr Noor Hisham berkata, mangsa (kes 9,578) ada latar belakang penyakit strok dan sukar bergerak sendiri sejak Mac lalu akibat patah tulang utama di kaki.

"Beliau mengalami gejala demam pada 4 September lalu, namun tidak mendapatkan rawatan.



20 jangkitan baharu dilaporkan, setakat jam 12 tengah hari semalam, meliputi 17 penularan tempatan dan tiga kes import dari New Zealand, Qatar serta India.

**Noor Hisham Abdullah,
Pengarah Kesihatan**

"Pada 7 September lalu, beliau dikesan sebagai kontak rapat kepada anak dan cucunya adalah kes positif dalam Kluster Sungai (kes 9,458 dan 9,547) lalu dimasukkan ke Hospital Sultanah Bahiyah, Kedah," katanya.

Susulan itu, beliau berkata, pi-

haknya sudah menjalankan ujian saringan COVID-19 ke atas lelaki terbabit pada 9 September lalu.

"Keadaan beliau merosot dan dipindahkan ke Unit Rawatan Rapi (ICU). Beliau disahkan meninggal dunia pada jam 5.45 petang semalam (kelmarin)," katanya.

Secara keseluruhan pula, Kedah mencatatkan angka jangkitan baharu yang tertinggi, semalam, iaitu sembilan kes membabitkan lapan dalam Kluster Sungai dan satu lagi dikesan ketika saringan pesakit Jangkitan Pernafasan Akut Teruk (SARI).

Dr Noor Hisham berkata, ia adalah sebahagian daripada 20 jangkitan baharu dilaporkan, setakat jam 12 tengah hari semalam, meliputi 17 penularan tempatan dan tiga kes import dari New Zealand, Qatar serta India.

Beliau berkata, pertambahan itu menjadikan jumlah kumulatif jangkitan COVID-19 di negara ini 10,167 kes dengan 722 kes aktif.

"Sabah mencatatkan lapan kes baharu, iaitu tiga dikesan ketika saringan rujukan ke Hospital Tawau dari Hospital Semporna dan masing-masing satu kes saringan pesakit SARI di Hospital Tawau, saringan prapembedahan di Hospital Keningau, saringan komuniti di Tawau, Kluster Benteng LD serta Kluster Bakau," katanya.

Seramai 12 individu dirawat di ICU dengan dua memerlukan bantuan pernafasan, manakala 51 kes sembuh dilaporkan, semalam, menjadikan jumlah kumulatifnya sebanyak 9,315 (91.62 peratus).